

Evening Dogri (NSD)

08-07-2025

खबरां

1. प्रधानमंत्री नरेंद्र मोदी होर अज्ज ब्राजील दे राष्ट्रपति लुईस इनासियो लूला दा सिल्वा हुंदे नै दौनें मुल्खें बशकार आर्थिक रिश्ते गी बढ़ावा देने लेई ब्रासिलिया च गल्लबात करडन।
2. सरकार राश्ट्री जरनैली शिड़कें गी होर पयारवरण दे अनुकूल बनाने लेई ककई गैइयां पुट्टारदी ऐ-आखेआ केंद्री मंत्री नितिन गडकरी होरें।
3. बिहार सरकार नै सरकारी नौकरियों च महिलाएं गी 35 फीसद कोटे लेई डोमिसाइल नीति लागू करने दी घोशणा कीती ऐ।
4. भारती मौसम विभाग नै अगले 4 दिनें दौरान देश दे उत्तर पच्छिम हिस्से ते पच्छमी तटें च भारी थमां मती भारी बरखा बरने दी पेशनगोई कीती ऐ।
5. टेक्सास च आए दे हाड़ें करी मरने आहले लोकें दी गिनतरी 100 थमां पार-दर्जन भर अजे लापता न ते तलाशी ते बचाऽ अभियान अजें जारी ऐ।
6. भारती हज कमेटी नै आधिकारिक तौरा पर हज 2026 आस्तै दरखास्त प्रक्रिया खोल्ली दिता ऐ ते एह प्रक्रिया सुविधा आधिकारिक हज पोर्टल ते हज सुविधा ऐप दे राहें हासल होग।

<><><><><><>

PM-Brasilia

प्रधानमंत्री नरेंद्र मोदी अज्ज ब्रासिलिया च ब्राजील दे राष्ट्रपति लुईस इनासियो लूला दा सिल्वा हुंदे कन्नै प्रतिनिधिमंडल स्तर दी गल्लबात करडन। इस गल्लबात च बपार, रक्षा, उर्जा, अंतरिक्ष, तकनीक, राईबाई, सेहत ते लोकें थमां लोकें दे सरबंधें सने आपसी हितें दे खेत्तर च दौनें मुल्खें बशकार गल्लबात मगरा केई समझौते पर बी दस्तखत होने दी मेद ऐ।

<><><><><><>

PM-Namibia

प्रधानमंत्री नरेन्द्र मोदी 5एं देशों दी जात्तरा दे खीरी चरण च कल नामीबिया दी राजधानी बिन्डहोक पुज्जडन। उन्दी एहू जात्तरा नामीबिया दे राष्ट्रपति नेतुम्बोज नंदी नेतवाह हुंदे आसेआ दित्ते गेदे निमंत्रण पर होआ'रदी ऐ। श्री मोदी उन्दे कन्नै दपक्खिया वार्ता करडन ते प्रतिनिधिमंडल स्तरै दी गल्लबात बी करडन। प्रधानमंत्री नामीबिया दी संसद गी संबोधित करडन ते नामीबिया दे संस्थापक ते पैहले राष्ट्रपति डॉ. सैम नुजोमा होरें गी श्रद्धांजलि बी देडन। श्री मोदी हुंदी एहू पैहली ते भारत थमां कुसा प्रधानमंत्री दी त्री नामीबिया जात्तरा होग, जेडी 27 ब'रें दे अंतराल बाद होआ'रदी ऐ।



PM-Rio Visit

प्रधानमंत्री नरेन्द्र मोदी होरें आखेआ ऐ जे उन्दे ब्राजील दौरे दौरान रिओ डे जिनेरियो दा गेड इक नतीजाकुन, कारगर ते बड़ा महत्वपूर्ण रेआ। अपनी इक सोशल मीडिया पोस्ट च प्रधानमंत्री मोदी होरें आखेआ जे ब्रिक्स सम्मेलन दौरान कई सारे विशें पर खुल्लियै ते तफसीली बटांदरा होआ। उनें ब्राजील दे राष्ट्रपति ते उत्थूं दी सरकार दी सराहना कीती जिनें ब्रिक्स दी अपनी अध्यक्षता दौरान मता असरदार मंच बनाया। उनें आखेआ जे विश्व नेताएं कन्नै उंदी दपक्खी बैठकां, बक्ख-बक्ख मुल्लें कन्नै भारत दे सरबंधें ते दोस्ती गी होर मजबूती देने च कारी दियां साबत होडन।



Plantation-Drive Gadkari

सरकार कार्बन उत्सर्जन गी घट्ट करने ते देशै च राष्ट्री जरनैली शिडकें गी होर पर्यावरण दे अनुकूल बनाने लेई मती सारी गैइयां पुट्टा'रदी ऐ। देशै च अजें तोड़ी राष्ट्री जरनैली शिडकें पर 4 करोड़ 78 लक्ख बूहटे लागे ते 70 जहार बूहटे इक थाहर थमां पुट्टिये दुई थाहर लागे न। शिडक ट्रांसपोर्ट मे जरनैली शिडकें सरबंधी मंत्री नितिन गडकरी होरें एक पेड़ मां के नाम दे दुए चरण दे तैहत फरीदाबाद नोएडा अंतरराष्ट्री एयरपोर्ट कारीडोर च बूहजे लाने सरबंधी अभियान दे दौरान इक्क सभा गी संबोधित करदे होई आखेआ जे एक पेड़ मां के नाम धरती माता दे प्रति इक बड्डी पैहल ऐ ते एहू लोकें दी सांस्कृतिक ते नैतिक जिम्मेदारी बी ऐ। मंत्री होरें इस गल्लै पर जोर भरेआ ऐ जे ट्रांसपोर्ट मैहकमे गी चपासम ते पर्यावरण दे प्रति मती जिम्मेदारी ऐ कीजे देशै च 40 फीसद प्रदूषण सिद्धे तौरा पर परिवहन खेत्तर कन्नै गै बधदा ऐ।

Military-Officers

नौसेना प्रमुख एडमिरल दिनेश कुमार त्रिपाठी, ब्हाई सेना प्रमुख एयर चीफ मार्शल ए.पी सिंह ते सेनाध्यक्ष जनरल उपेंद्र द्विवेदी होरें अज्ज नमीं दिल्ली च सांझी कार्रवाई करने दे विशे पर सेना दे बड्डे अधिकारियें गी संबोधित कीता। कार्जक्रम दे दौरान त्रौनें सेना प्रमुखें आपसी तालमेल गी बनाई रखने आस्तै बचनबद्धता जाहिर कीती। भारती सेना दे मताबक इस संबोधन च सांझी कार्रवाई दी योजना बनाने बक्खी खास ध्यान दित्ता गेआ ते भविक्ख च लडाई आहली गतिविधियें च नौसेना ते ब्हाई सेना दे बश्कार इकजुटता बधाने बक्खी खास जोर दित्ता गेआ।



Bihar-Women-Reservation

बिहार च राज्य सरकार नै सरकारी नौकरियें च महिलाएं आस्तै आरक्षण दे संदर्भ च डोमिसाइल नीति लागू करने दा फैसला लैता ऐ। हून महिलाएं आस्तै सरकारी नौकरियें च 35 फीसद आरक्षण कोटा तैय कीता गेआ ऐ। मुखमंत्रि नितिश कुमार हुंदी अध्यक्षता च अज्ज लग्गी दी कैबिनेट दी बैठक च एहू फैसला लैता गेआ। हुन छडी महिलां मेदवारें गी गै 35 फीसद आरक्षण दा फायदा मिलोग जेहडियां बिहार दी रौहने आहिलयां न। एहू प्रस्ताव सामान्य प्रशासन मैहकमें आसेआ रक्खेआ गेआ हा। बिहार थमां बाहर रौहने आहली महिला मेदवारें गी जनरल मेदवार मन्नेआ जाह्ग। कैबिनेट नै युवाएं, पलायन, कौशल विकास ते समग्र विकास दे मामलें गी दिक्खने लेई इक्क 7एं मिम्बरें आहले युवा आयोग दा गठन करने दा बी फैसला लैता ऐ।



FM-BRICS

केन्द्री खजाना मंत्री निर्मला सीतारमण होरें आखेआ ऐ जे ब्रिक्स बक्ख-बक्ख पक्खें गी किट्टे लेइयै अगडे बधाने दा इक महत्वपूर्ण मंच ऐ। उनें आखेआ जे टकोहदा करियै जिसलै कुल संसारी सतहू दियां संस्था-वैद्यता ते नेतृत्व दी चुनाती जां संकट दा सामना करै करदियां होन उसलै इसी सैह्योग गी निग्गर बनाइयै भरोसेमंद सुधारें दा समर्थन ते ग्लोबल साउथ दिएं समस्याएं गी मजबूत अवाज देइयै मसाल पेश करनी लोड्चदी। रियो डी-जिनेरियो च कल ब्रिक्स मुखें दे खजाना मंत्रिं ते सेंट्रल बैंक दे गवर्नरें दी बैठक गी संबोधत करदे होई सीतारमण होरें आखेआ जे भारत नै मजबूत घरेलू मंग, समझदार आर्थिक प्रबंधन ते लक्ष्य मिथियै राजकोशिय उपाएं दे तालमेल कन्नै सकारात्म ते अनुकूलता दा प्रदर्शन कीता ऐ। वित्तमंत्री होरें आखेआ जे बपार ते वित्तीय प्रतिबंधें गी लेइयै भारत दी नीति नै प्रतिस्पर्धा ते

उत्पादकता गी बढ़ावा देने दे उद्देश्य कन्नै बजारें च विविधता उत्पन्न करने, बुनियादी ढांचा आधारित विकास गी बाढ़ा देने ते ढांचागत सुधारें गी लागू करने पर ध्यान केंद्रित कीता ऐ। रूस दे वित्त मंत्री एंटोन सिलुआनोव हुंदे कन्नै इक्क बक्ख बैठक च वित्त मंत्री होरें द्विपक्षीय सहयोग विशेषकर वित्तीय खेत्तर ते न्यू डेवेलपमेंट बैंक कन्नै सरबन्धी मसलें उप्पर चर्चा कीती। सीतारामन होरें चीन के वित्त मंत्री लैन फोआन हुंदे कन्नै बी बैठक कीती।

<><><><><><>

PM-Jan Dhan

खजाना मंत्रालय नै अज्ज दस्सेआ ऐ जे बैंकें गी निष्क्रिय प्रधानमंत्री जन धन खाते बंद करने दा कोई निर्देश नेई दित्ता गोआ ऐ। एहू खबर मीडिया रिपोर्ट मगरा आई ऐ जेदे च दस्सेआ गोआ ऐ जे खजाना मैहकमे नै बैंकें गी इस चाल्ली दे खातें बी बंद करने लेई आखेआ ऐ। मंत्रालय नै इक बयान च आखेआ ऐ जे ओहू निष्क्रिय जन धन खातें दी गिनतरी पर लगातरा नजर रखदा ऐ ते बैंकें गी सलाहू दिंदा ऐ जे ओहू खाताधारकें कन्नै संपर्क करन ते उनेंगी खाते चालू करने आस्तै सलाहू देन। इस गल्लै पर लोऽ पाई गई ऐ जे जन धन खातें दी कुल संख्या च बाढ़ा दिक्खेआ ते खातें गी बड्डे पैमाने पर बंद करने दी कोई बी घटना मंत्रालय दे सामने नेई आई ऐ।

<><><><><><>

Puri-Norway

पेट्रोलियम ते प्राकृतिक गैस मंत्री हरदीप सिंह पुरी होरें आखेआ ऐ जे भारत अपनी उर्जा क्षमताएं गी बढ़ाने ते बेहतर बनाने आस्तै अपनी विशेषता दा फायदा लैने लेई नार्वे च बक्ख-बक्ख परियोजनाएं दी खोज करा'रदा ऐ। उनें नार्वे दे बरगन च Northern Lights Co 2 terminal दा दौरा लाया ते हाईड्रोकार्बन दी खोज करने आहली तकनीकें खास करियै नार्वे दे उर्जा पेशेवरें आसेआ गहरे समुद्र दे अन्वेषण पर चर्चा कीती।

<><><><><><>

Pakistan-Fire

पाकिस्तान दे पेशावर शैहरा च लगगी दी अगू च घट्टोघट्ट 5 लोकें दी मौत होई गई ते 2 अगग स्थालने आहले कर्मियें सने केई होर जखमी होई गे न। पुलसै दस्सेआ ऐ जे कल राती खैबर पखतूनख्वा खितते दे पेशावर शैहरा दे कोच्ची बजार दे मती अबादी आहले इलाके च इक घरै च अगग लगगी गई। उनें इब्बी दस्सेआ जे एस घरै थमां 6 लोकें गी बाहर कड्डेआ गोआ जिंदे चा 5 लोकें दी माझी हालत करी मौत होई गई।

IMD

भारती मौसम विभाग नै देशै दे उत्तर पच्छिम हिस्से ते पच्छिम तटें दे कन्नै-कन्नै अगले द'उं दिनें दौरान मती भारी बरखा बरने दी भविक्खवाणी कीती ऐ। मौसम विभाग मूजब मध्य प्रदेश च अज्ज मती भारी बरखा दी मेद ऐ। दुई बक्खी मौसम एजेंसी नै अगले द'उं-त्र'उं दिनें दौरान पच्छिम बंगाल, ओडिशा ते झारखंड च बी भारी बरखा दी पेशनगोई कीती ऐ। विभाग दे वरिष्ठ वैज्ञानिक नरेश कुमार होरें आकाशवाणी समाचार कन्नै गल्ल करदे होई आखेआ जे पूर्वी मध्य प्रदेश आस्ते रेड अलर्ट जारी कीता गेआ ऐ। उनें दस्सेआ ऐ जे पूरे नागालैंड च बरखा नै बड़ी तबाही मचाई जेदे कन्नै मते सारें जिलें च हाइ औने, ल्हास-पस्सियां पौने ते बुनियादी ढांचे दे नुकसान दी खबर ऐ।



Texas-Flood

अमरीका दे मध्य टेक्सास च आए दे खतरनाक हाइ कन्नै 104 लोकें दी मौत होई गेई ऐ ते 41 होर अजे लापता ना। मीडिया रिपोर्ट मूजब आंकडत्रें तेजी कन्नै बधदे जा'रदे न कीजे बचाव अभियान चला'रदा ऐ जेदे च लापता लोकें दी तपाश जारी ऐ ते मरे दे लोकें दी गिनतरी च लगातार इजाफा होआ करदा ऐ। मती सारी लोथें दी अजें तगर पंछान नेई होई सकी ऐ।



Hajj-Applications

भारती हज कमेटी नै आधिकारिक तौरा पर हज 2026 आस्तै दरखास्त प्रक्रिया खोल्ली दिती ऐ। पवित्तर हज जात्तरा मुस्लिम समुदाय आस्तै बड़ा मता महत्व रखदी ऐ। इच्छुक तीर्थ जात्तरी hajcommittee.gov.in पर आधिकारिक हज पोर्टल दे राहें जां आई.ओ.एस ते एंड्रायड दवें उपयोग करने आहलें आस्तै उपलब्ध "हज सुविधा" मोबाइल एप्लीकेशन पर अपनी दरखास्त जमा करी सकदे ना। आनलाइन दरखास्त विंडो 7 जुलाई 2025 कोला 31 जुलाई 2025 रातीं 11:59 मिनट तगर खुल्ली रौहगा। हज कमेटी नै आवेदकें कन्नै निवेदन कीता ऐ जे ओहू आवेदन करने शा पैहलें सब्बै दिशा-निर्देश गी ध्यान कन्नै पढी लैन। आवेदन दी अखीरी तरीक जां ओहूदे शा पैहलें जारी मशीन कन्नै पढने जोग भारती अंतरराश्ट्री पासपोर्ट होना लाजमी ऐ ते ओहू घट्ट कोला घट्ट 31 दिसंबर 2026 तगर मान्य होऐ।



Amarnath

3 जून गी शुरू होई दी श्री अमरनाथ जी दी सलाना जात्तरा पूरी चाल्ली रमानदारी ते बवस्था आहले ढंगै सिर जारी ऐ ते अज्ज जात्तरा दे 6में रोज पवित्तर गुफा च मत्था टेकने आहलें दा आंकड़ा 1 लक्ख कोला उप्पर पुज्जी गेआ ऐ।

जम्मू थमां अज्ज बडुलै 7 ज्हार 541 श्रद्धालुएं दा इक होर जत्था बालटाल ते पहलगाम लेई रवाना होआ। जम्मू दे भगवती नगर आहले आधार शिविर थमां 309 गड्डिएं दे काफले च बरदाया गेआ।



LG-TB Mukt

जम्मू-कश्मीर दे उपराज्यपाल मनोज सिन्हा होरें अज्ज सब्भनें डिप्टी कमिशनरें ते सेहत अधिकारिएं कन्नै इक उच्चि सतह दी बैठक लाइयै जम्मू-कश्मीर च प्रधानमंत्री टी.बी मुक्त अभियान दी अमल आवरी दी समीक्षा कीती। एल.जी होरें जोर देइयै आखेआ कि तपेदिक जिसी टी.बी बमारी आखेआ जंदा ऐ जे बक्ख-बक्ख पैहलुएं बारै बडु पैमाने पर लोकें अंदर जागरूकता पैदा कीती जानी लोडचदी जियां जे एहू बमारी ऐ केहू, कियां फैलदी ऐ, एहदे शा कियां बचेआ जाई सकदा ऐ ते जेकर कुसै गी एहदी कसर होई बी जंदी ऐ तां ओहदा इलाज केहू ऐ। उपराज्यपाल होरें मैहकमा सेहत गी एहू जकीनी बनाने लेई आखेआ जे फील्ड अमला अपनी जिम्मेदारी पूरी निष्ठा ते तनदेही कन्नै निभा ते समाज गी अगगे होइयै पैहले गै इन्ना जागरूक बनाई देयै जे इस बमारी दे लग्गने दी कोई शैका गै नेई बचै। मनोज सिन्हा होरें जम्मू-कश्मीर गी टी.बी थमां पूरी चाल्ली मुक्त बनाने लेई हर सतह पर आपूं च नेडमा तालमेल बनाइयै कम्म करने दी जरूरतै पर जोर दित्ता तां जे जम्मू-कश्मीर गी तौले टी.बी मुक्त घोषित कीता जाई सकै।



LG-Tourism Meet

उपराज्यपाल मनोज सिन्हा होरें अज्ज श्रीनगर च आयोजित सैलसफा सचिवें दी बैठक गी संबोधित करदे आखेआ ऐ जे एहू आयोजन आतंकवादिएं गी इक करारा जवाब ऐ ते रमानदारी, तरक्की ते खुशहाली दी बत्तै पर जम्मू-कश्मीर दी तेजिया कन्नै बधदी गैँस दा प्रतीक ऐ। उनें आखेआ जे जम्मू-कश्मीर एल्लै इक ऐसी ताकत बनी चुके दा ऐ जिसी अगडे बधने कोला कोई रोकै नेई सकदा। कल शुरू होई दी द'ऊं दिनें दी इस बैठक च उपराज्यपाल होरें आखेआ कि इस बक्खी जित्थे स्हाडे सुरक्षाबल आतंकवाद दा मकाबला करै करदे न,

उत्थे पूरे समाज गी बी कार्रवाई करनी लोड्चदी, आतंकवाद ते हिंसा दे खलाफ इकजुट होइयै ते रमानदारी ते तरक्की गी समर्थन देइयै। उनें आखेआ जे पाकिस्तान आसेआ समर्थित आतंकवाद दे खलाफ आम नागरिकें दा विरोध करना, घाटी च स्थाई तौरा पर रमानदारी बहाल करने दी भेठा इक खरी ते दिल बधाने आहली सारत ऐ। मनोज सिन्हा होरें अगगे आखेआ जे समूलचे जम्मू-कश्मीर गी इक मिक्क होई जाना लोड्चदा, इस गल्लै गी पक्का करने लेई जे केंद्र शासित प्रदेश च आतंकवादिएं गी छप्पने लेई कोई थाहर नेई लब्बै।

<><><><><><>